

四庫全書

集部

欽定四庫全書

清容居士集卷二十七

元 袁桷 撰

神道碑銘

朝列大夫同僉太常禮儀院事白公神道碑銘
白於太原為令族至金源氏興太原衣冠為最盛而白
氏兄弟相繼踵儒科故中大夫樞密院判官兼右司郎
中輕車都尉南陽郡伯諱華字文舉其季也唐宋樞密

無判官金天興帝賞器之特置職以寵繇是相仍自郡
伯始郡伯後居真定生子四人俱有時名君諱恪字敬
甫少警敏三歲善作字書八卦八字有以見于鄉先生
元公好問公作詩深器之郡守上其能將薦于朝郡伯
謝弗許稍長里之先進張先生耀卿愛其才獎拔力成
就至元中世祖遣使詣州郡試明經生復門役君首預
選弱冠試吏探姦拔冤獄具御史不能撓後為河南按
察司書吏有尉卒利孀婦財未終喪强贅於姑家既而

虐其婦復不禮其姑姑告於官絕之尉卒隱其罪屢訴
終喪無明文事久不決君悉疏所犯聚邑人以告婦得
終養其姑焉至元十四年江南建行臺御史大夫相威
公慎簡所屬署君為掾史即條不便事凡二十大夫見
世祖力陳之允十有八最著令者大辟成讞上刑部聽
報可賈某公田租歲減什二十八年授從仕郎江東建
康道提刑按察司經歷改荆湖占城等處行省都事時
荆湖省臣某括財恣威福君度不可與共事辭不拜後

果受誅二十四年改浙西提刑按察司經歷遷平江丁
母羅夫人憂以夫人喪葬于吳將終老焉會詔舉不附
權臣自晦者有以君辭荆湖事薦于上除福建宣慰司
經歷閩郡廣遠豐歉不同是歲汀州穀善收戍兵所給
糧不登數福泉興化穀驟踊有司議移三郡穀于汀君
建言道途轉輸大無益發貴粟以賑三郡歸直于汀可
多得穀誠兩便有司難之君署記曰使有罪願已獨受
卒如其議而官之贏糧果增倍宣慰司復為省君治六

曹文牘以俟平章某公知君簿領有能名受其籍以付吏三十一年丞相太傅公為湖廣平章君時為都事俾陳樞密院及本省利便侍丞相入覲有旨允其奏復陞員外郎湖光聯絡左右江官吏秩祿歲一再受俸於省地遠得不償旅食有棄俸不願受者君建議隨所部以給迄今行之衡永戍兵耕閒田官出牛輸其租牛死不得落籍戍兵歲率鋸數十萬以酬君惻然計之曰牛死當納皮角于官除故籍而以官租捐納之則得矣戍兵

繇是免害有省臣獻廣西地肥沃可為田徙湖南居民
往耕之當調戶五千君力言不可平章公是其議奏止
之獻田者復調兵征思明發運粟入賊境道遠雨淖荷
擔者各持去志君憂有他變出直募民民樂受以往峽
州歲饑請粟于官有欲核驗始發君言饑民朝不及夕
使核驗死當過半矣大德二年進本省理問官推誠燭
幽莫有滯濫而言論風采彬彬文雅蓋以吏治濟其儒
行者與四年改江西省理問官究偽楮獄得直于時翰

林承旨閻公復持士論賢否有言曰白文舉父子兄弟俱有文名敬甫幼負俊聲老不入翰林咎將誰執奏為翰林待制復同僉太常禮儀院事儀度閑整贊道裡祀動不踰矩蒼顏玉立真善為頌者也桶向為翰林應奉幸得侍同朝聆議論接顏色寬厚平實言金諸老行事歷歷指掌晚自號竹梧其為文不事雕飾扶掖後進侃侃自持知其於孝友有加也生丙午歲十有二月至大二年己酉四月卒于官年六十有三積階至朝列大夫

有詩文若干卷藏于家某年某月某日葬于真定路真定縣之朱洛村曾祖仲溫隱德里居妣李氏祖宗完金故贈朝列大夫輕車都尉南陽郡伯祖妣李氏妣張氏羅氏君羅出也娶盧氏中書架閣管勾順之女翰林承旨摯之女弟男五淵安福州儒學教授沅州路蒙古教授皆蚤世湛今承事郎浙東道宣慰司都元帥府都事洙國子學正灝江西湖東道憲司書吏先卒女三長適李崇靜江路稅課提領次適甄遂良李適李權河間

路某州樂壽縣尹孫男八貞采暹辟楸闕樞挂孫女四曾
孫男一女三湛為元帥府都事摘適請告歸里以事狀
拜且言先君子嘗得與子同院銘莫如子摘謝不敢辭
迺為之銘曰

有完者圭藉之以韋不泄其溫裡祀用祇受中以生剛
柔是宜木神則仁其用不陂顯允太常幼敏且岐挹其
粹精飭躬以教黜明養潛爰燭姦暴匪伊求之我曷望
報道在一源挈以簡要詹詹炎炎益飾其巧佩玉舒徐

六轡如濡執簡以陳矢言不迂彼計功者承色善趨較以虧成卒喪其軀有高維閔茲為守儒恒山之陽松柏茂直詔于雲仍是謹是則撫仕之初璫篋踵夾詢彼故老曰惟祖德我銘孔昭庸告爾無斁

贈翰林學士嘉議大夫馬公神道碑銘

浙東道宣慰使都元帥馬公踵門以告曰惟吾先公隧道碑未立子職在太史勲舊死事貞逸之士嘗焯焯紀著登載金匱先公仕雖不顯其見之于世祖受學于碩

師河內後進猶能誦習遺事敢以行實告它日上其事
史館則子實前史官庶幾傳信可永久敢再拜以請謹
按公諱充實字士輝覃懷河內人父庭大父某皇朝入
中原略地定圖貢詔大帥專除授嘗得署郡縣副貳兵
亂大父以上名諱弗可攷公八歲遭大喪從母完顏氏
攜載以從其夫李侯侯長萬夫隨征六盤善謀畫裨贊
李益取自助六盤為高昌要衝高昌之俗收經史立校
官地與西域接故其聲音文字詳於諸國公得其說而

習焉世祖皇帝大一寰宇命以其國語別立文字用於
印章宣勅其字母與西域相近公旁曲通暢單出雜比
會其指歸學者爭詣門請業許文正公薦于上以儒服
入見于柳林委曲問時事悉以國語對上大喜錫以錦
帽語翰林學士承旨某公左丞相耶律公宜以為稠人
師遂僅授將仕郎懷孟路蒙古教授再授承事郎襄陽
路均州判官然不樂仕進嘗曰我能知樹藝遂力治其
閒田因原隰以種所宜木春華秋實茂鬱滿道過者咸

曰此馬公手植也縣西有田二十餘頃皆先世業歲久
勢家悉占其肥沃後服公純德始願歸其田卒酬直以
受方許文正公講授鄉里時靳許可遊其門者察以歲
月始命執弟子禮獨見公篤厚溫謹即俾就列授性理
大義以躬行為先公能守之故其退讓無干進之念而
恂恂里閭克修克儉皆師訓也文正公侍帝所無虛日
懷孟素產地黃可釀酒其修治貴精謹上問文正鄉弟
子孰為誠實即以公對公素知製法得山中石泉如法

釀以進許公之薦將繇是俾嚮用而事若不偶公復不
以為介豈安於命分者與後有奏為河渠使者又將奏
為蒙古院學士皆力謝不受里中有德大師金內族年
過百齡能知人壽天前後俱尊異之公甫生一日德夢
其故友宋讓曰吾今為馬家子矣後抱示之摩頂即為
笑容噫死生事不可詰若前史所載又有若侶焉者寧
勿書卒于至元二十九年四月六日年六十葬于河內
縣青平村先塋之次娶劉氏征西萬戶某之女後公四

年卒生二子長鑄即元帥公次鎔朝列大夫廣西海北
道肅政廉訪副使次娶李氏生二子銳奉議大夫廣州
路治中次銅皆蚤世女五人適陳吉甫張漢卿王某朱
仲德楊某鑄男四長德潛內監尚衣次德源德淳皆國
子生德淳今為鎔後德淵府學生女四適太祝王世昌
戴彥實李起宗郭成可銳男二德潤德溫曾孫一孟孫
至大三年鑄為禮部郎中推恩得贈翰林學士嘉議大
夫上輕車都尉扶風郡侯諡莊惠劉氏贈扶風郡太夫

人李氏封扶風郡夫人鑄官中奉大夫浙東道宣慰使
都元帥又贈公某官劉氏贈某夫人大父贈某官大母
完顏氏贈某夫人摘於是有言曰仕嘗患弗及其身歿
而子榮推其榮以及其先而為善之效著矣世固有極
其顯光歿無德以傳卒至於子孫流播可勝道哉元帥
公中外揚歷清白益著今帥浙東事不苟求而明燭幽
隱不為己甚遺其後者猶先公之志是宜銘詩以昭來
世銘曰

相彼土田或隰或陵深根平培翁焉以升實者在之茹
者釜之梓漆是供絲枲是輔種不亟求曰惟歲年視彼
種德亦云其然溫溫馬公植善無倦仕匪蹇時從我之
願經緯聲音服習訓則奉盈彌謙以退以默詔爾孫曾
戰兢是承蔽芾長松勿替厥聲

翰林學士承旨榮祿大夫遙授平章政事贈光
祿大夫大司徒上柱國永國公諡文康閻公神
道碑銘

世祖皇帝應期握圖肇函諸夏文經武緯各當厥職粵
惟東平地接鄒魯時則有嚴忠武公披荆翦蕪扶植儒
學作成逢掖卒能敷文帝庭風動八表鄆之得人號稱
至盛而閻徐李孟世名以四傑焉自至元至于大德更
進迭用誥令典冊則皆閻公所獨擅公諱復字子靜幼
入東平府學蜚聲炳著操筆綴詞賦音節和暢融液事
理率占為舉首幼從贈翰林學士康公康大器之太常
徐公道隆年長有聞譽不敢以後進待公在翰林最久

贊書積几高下輕重擬議精切傳誦以為楷則其待僚
衆擇敏秀者自近不滿意者不復強以文墨任滿不調
雖請託亦不得以叙遷故事表牋自待制而下分撰公
命名為一通輯其精良融為一家而別擬以示其屬始
仕東平行臺書記御史臺掾至元八年入翰林為應奉
文字進修撰十六年陞翰林直學士十九年侍講明年
兼集賢侍講學士于時兩院皆領會同館錄是自應奉
至侍講皆兼會同二十三年陞翰林學士改集賢學士

大德元年復除翰林學士四年拜翰林學士承旨而知制誥修國史皆視其職以進其補外職則僉河北河南道提刑按察司事浙西道肅政廉訪使世祖陟方召公草詔于上都成宗繼崩復召公上都武宗即位首上疏曰惜名器明賞罰擇人材朝論韙之賜金錦白金以彰其直顧公老矣願致事以歸迺進階榮祿大夫遙授平章政事給半俸以佚其老且命壻李嗣宗特授承直郎同知高唐州以侍養仁宗在東宮時知公歸特遣使賜

幣命公卿設祖帳于都門外桷嘗以院屬侍公入議事
堂鵲峙山立中外各改容以奉語簡意足不屑屑持辯
爭丞相而下皆傾動一日草詔書其語意難以入國語
大臣疑之有集賢學士亦出微語公召掾史具紙筆請
學士改撰學士大愧却立會食畢公改為之而前詔一
字不復用一坐大驚公以文墨自任不肯為緊要官罷
尚書省時世祖召入便殿諭以卿為執政官何如公謝
不能世祖曰知讓誠美事宜勿強成宗擇相召公密問

曰左丞相缺孰可任以江浙行省左丞相某對益稱上意其陳于上者大較若是定孔子主祀賜孔林洒掃及祀田皆所建明興國學論廟樂所助為多而其在憲府以敦本崇化為先務當大德星變疏十九事皆切中弊壞成宗賜楮錢萬以優寵公受知成宗為深嘗問其所師承金玉幣器錫賚有加仁宗初政首命召公以疾辭皇慶元年三月某日年七十有七薨其年五月葬于先塋之側公將薨時夢游祠宮有道士迎問公年口占一

詩以答覺而言曰吾殆云逝矣世方倚公為重而公不復少留可慨也矣其所為文號靜軒集內外制集若干卷將傳于世稱繇泰定元年得告歸里越明年公之壻奉直大夫南臺監察御史李嗣宗以書來海濱告曰子職在太史出處大致子侍承知為詳隧碑未立願登其事于石以貽永遠稱取踏莫辭謹按閭氏平陽人今居高唐州曾大父行贈嘉議大夫大司農卿永安郡公諡懿德妣趙氏永安郡夫人祖和叔贈昭文館大學士資

善大夫永安郡公諡昭獻妣武氏封永安郡夫人考忠
故高唐主簿贈銀青榮祿大夫大司徒永國公諡惠穆
妣牛氏劉氏追封永國夫人娶尹氏趙氏李氏男一嗣
慶以蔭授奉訓大夫廣平路威州知州未任以疾卒女
一孫男二翁安翁壽女適即御史君也公既下世婦弟
淮東宣慰使李處恭時為吏部侍郎慨然曰吾寧使閭
公終無以易名遂請于朝得贈光祿大夫大司徒上柱
國永國公諡文康其姊亦封永國夫人而公三世亦以

令典得追贈並榮猗歟休哉銘曰

泰伯之魯食采於閭因邑為氏慶源涓涓太原之閭顯
武後唐戰多著名分茅為王有孫曰象決科就文撫綏
降邦拯其溺焚迨迨裔孫實家平陽試邑死事和川歸
藏是生惠穆占籍名郡推誠急施樂善不靳教子有行
俾離其鄉業精行成何求不償顯允文康以文偉著執
其牛耳莫或敢侮斟酌泰和密勿元氣英露喬雲萬物
履履鎮于詞垣幾四十年矜彼不能擢才進賢維我世

祖養茲國珍薦更三宗猶昔舊臣公歸白雲多士盡悼
凡今日能亦公所造何以遠貽有豐其碑實茂聲弘播
于銘詩

周瑞州神道碑銘

景定元二間賈相某隱城下盟罔宋帝理宗邀奇功外
受強寇內括民業廷紳鉗舌奉風旨稍異議輒諷臺臣
斥去小者歸田里大者入蠻瘴時則有豫章周公以史
館檢閱入對曰李璫繇山東來歸實急而求我區區一

旅瞭然可見借援無功彼敗我辱招釁之道梁武在位四十餘年卒墮其計陛下臨御日久不宜復蹈前轍父全逆叛著在信史已登告于祖廟壇乞改正是作史者誣枉逆全行事准東人猶能道此亦陛下在宥之所覩困獸投林誠不可使縱意干紊又曰臣近覩輔郡和市富室田業以備軍餉良以和糴廣造楮多楮多則楮益賤是誠不可不變通也今所在置司擇其上腴低直以酬又欲令賣田之主抱佃輸租歲或荒歉田主必當割

他祖以補他祖既竭歸于耕夫耕夫逃亡歸于鄉役可謂獲近效而忘遠慮自漢以來納粟補官歷代循用輸粟既微補爵亦輕不足以動豪民臣以為宜繇尚書省樞密院吏員為出身定品格立止法則大家相胥以勸可以立辦粟可無糴楮可減造矣疏入相大怒言者急擊去而公風節言論著江表公諱應合字淳叟七歲授詩書通習大義年十七父如翼贈朝奉郎母胡氏贈安人相繼即世逮事王父友賢以卓行稱宋寧宗朝嘗旌

其間書棣華扁以賜號為棣華周氏嘗從棣華君至近
郊望邑有火光亟返奉安人柩入祠堂袖神主以出王
父竒之紹定四年詞賦應鄉書不中始悔曰吾安能事
雕刻乃學春秋經結廬深密探微索幽從者益衆淳祐
九年應試兩浙轉運司果冠諸生十年有旨試轉運司
者入別考復在首選授江陵府學教授待次歸里授生
徒曲為講說會歲饑首率鄉黨立三事一曰貸貧民二
曰濟疾苦三曰賑游末包公恢記曰是三者足補義社

倉之未備十三年官江陵首講孟子曰壯者以暇日修其孝弟忠信此凡民也士無一日而不修士不當以壯幼論師友言行去其偏黨據會立要學者深德之創鄉射齋申勵武備別立凡例以修郡乘趙丞相葵雅知名會宣撫荆湖辟為元寮以志書未成辭馬公光祖帥荆湖師援夔路俾為屬主贊畫蜀事益急詔趣馬公援蜀馬公聽羣議不決公獨贊進師乃解開慶二年馬公帥沿江復佐江東兼長明道書院淳公嗣久絕詢諸池陽

得五世孫偃孫以主奉穉二程遺語若干卷復以馬公
命為新金陵志自史館歸外補通判饒州後攝郡事決
疑剖奸絕煩擾催督部使者爭薦之咸淳三年主管華
州雲臺觀四年通判寧國府其治如饒而補其前逋復
攝郡事大修學宮除輸苗之不便於民復梅都官諸孫
斥豪禁吏人不敢以犯湘帥汪公立信舊同寮奏辟通
判潭州兼參議官丞相審治行目諸賢交章無虛歲亦
欲俾出門下諭意長沙毋行公不可相聞益怒會江文

忠公在相位以國子監簿進擬亟命御史李珣劾德祐元年登極恩復官是歲賈相兵敗走維揚起守寧國江西以瑞缺守辟知瑞州將治兵為固圉計與帥議不合劾去素善訓子長子天驥年六歲敏記誦宋有童子科俾習之年十一以能文詞舉後登上第人取以為法寰字合一天驥守吉州迎以養却甘茹蔬感慨遁迹人不知太守為有父至元十七年卒年六十有八眉山程尚書公許嘗語曰君理義則濂溪章表侶平園以溪園

自號為宜維周氏籍會稽唐以憲銜官鎮遏江州曰勅
為御史中丞銀青光祿大夫因家江州六世孫曰師教
訓生徒里人稱曰一經居士又三世曰昌元妣胡氏是
生棣華君子男四長即天驥次天虎天鳳天龍女適朝
奉郎經略參議官吳疇吉州教授劉明仲從仕郎潭州
路湘陰令冷頤孫孫男十二志道某官志仁志德志學
志義志立志遠志禮志行志敏志伊志崇曾孫男十六
女二四世孫十有八五世孫三娶王氏繼萬氏俱封安

人某葬在吉水縣同水鄉臻善里鷓鴣山之原天鳳幼歲入官熟昔時言行罔缺軼擢備翰苑屬與之言論傾倒身履目接人則曰官簿不足恃久而曰彼兩家不可輕擢投紱歸里強使技文天鳳以泉州推官同在院未幾擢以喪子歸天鳳請銘銘曰

蹇蹇史君內剛以文察其要機叩于帝閣蒙恥冒功厥脛四聞我后不知惟相之云佐郡未幾輒劾以去冥心委順不懼伊沮山鏡野刻勤彼纂組謂宜掌制命則不

遇教子有謨見其提符我實故臣逃空以娛叔也秉文
庭誥靡渝詵詵者孫冠佩是侶宦若不偶名則罔替昭
銘松阡以告良史

有元故贈中憲大夫中書吏部侍郎騎都尉陳
留郡伯郭公神道碑銘

大德十一年換再入翰苑郭侯郁文卿時為江浙行省
都事獲締交焉見其受易學于侯先生得見尊公于庭
下延祐五年文卿為中書檢校余時直集賢來往益密

而其尊公正席危坐凡辱交于文卿者咸執弟子禮嘗
聆其言曰吾兒幸竊祿位不敢以自喜其所行事未嘗
不察其指要而足以垂後者亦將以示吾子若孫居吾
語子焉始兒以吏能及格為掾都省定水縣門計功以
便民民不敢謾而官費以省晉山薦饑且疾疫親歷其
家去偽冒為善藥以治得活者三千人為宣徽都事行
省都事勾稽奉公增餼羊若干而浚役于松江者去其
工直十有六萬石吾懼其瘠于民也民不以病是則吾

之所深喜也于時衛府調卒萬五千至都城計其往復
俾俱以九月集白于省大臣大臣許之至則器甲精銳
士馬肅給為諸省冠其餘稽工會程而不志苛刻於余
諸孫良有望矣其在浮梁也迎余以養見其治學宮立
鄉校廣弟子員知余後裔之必有以儒術顯者矣公之
語於余者知其嗣必昌也公飲酒不亂道金朝遺老行
事猶能反復感慨鄉人尊為隱君是年八月卒于京師
得年七十有六公諱天祐字祐之世居汴梁封邱縣呂

村祖進考誠嘗職民千夫長娶林氏汴梁為金遷都兵
逼野處僑居大名大帥器之因以長千夫郭氏大墓數
十兵亂蹂藉不可攷而新塚猶存三房審其為大家明
矣延祐六年八月某日葬于先塋郁為浮梁州以大賚
恩進封奉政大夫知宜興州驍騎尉延祐七年郁授中
順大夫知高郵府至治三年授中憲大夫同知兩浙都
轉運鹽使司事泰定元年授亞中大夫僉江西河東道
肅政廉訪司事二年七月贈公中憲大夫中書吏部侍

郎騎都尉陳留郡伯未幾郁改授慶元路總管摘嘗以
謂貴顯之及於親必原於遠祖親榮矣而考其若子之
行事是猶望於後也自侍郎之無祿亞中公四歷要官
摘略其治狀以侍郎之言為可證豐功茂德見於去思
誠不在是也配李氏累贈陳留郡君公男四長亞中次
迪嘗為錢穀官厚海道運糧萬戶府百戶仁以黃陂主
簿今為江浙行省掾郁娶孫氏封陳留郡君子三澍渥
國子生壽蚤卒迪娶崔氏子三厚娶崔氏子四仁娶孫

氏亞中來乞銘銘曰

大梁之區厄為兵墟層城鬱我以難以鋤維郭氏先歷
有譜圖迢迢郭公在唐紫朱吏部有謙弗克以居以其
先聞維訓菑畬味道養齡擊鮮以娛治官莅民考于庭
趨大樸弗雕盛德莫踰維公有子克遵令謨述銘孔昭
勿替勿渝

王氏先塋碑銘

延祐四年中書左丞王公出為江浙省右丞將行天子

遣使繇上京傳旨曰毅其勿行七月拜中書省平章政
事繇是推恩如令式得贈其曾祖為正奉大夫山東東
西道宣慰使上護軍魯郡公妣周氏魯郡夫人於是平
章拜命惕然有言曰維我祖蓄德閔華慶貽孫魯惟昧
實蔑克稱天子寵綏于臣子厥亦赫厚願叙先德以收
合宗譜子職在太史為我表而銘之稱謝不得辭謹按
郡公名汜世家德州平原金將亡士族奔播南徙郡公
有子全甫七歲隨從母走亳州稍長壻田氏由須城鄆

城三徙後占籍汶上晚歲嘗謂子曰吾幼罹兵凶僅能
記我考妣名字遺牒舊事不復省今祖墓在平原郭東
北五十里曰水務鎮我死力不能歸葬若等毋忘平原
也今以平章累贈資德大夫江浙等處行中書省右丞
魯國公公二子長曰玉次曰傑二女嫁張氏葛氏玉嘗
一試吏輒謝去謙約無表襮策杖鄉社通慶弔煦煦無
億意今年八十有四以榮祿大夫河南河北等處行中書
省平章政事柱國魯國公致政于家始平章以詹事歸

養魯公曰聖天子軫齒召至渥我雖老尚善飯汝不效
犬馬報居家何為也又附詔使奏曰不佞老臣骸骨堅
且強謹遣臣毅一心事陛下上大喜特授集賢學士資
德大夫其配郭氏朱氏封魯郡夫人後以推恩進郡公
訖封魯公魯公子三人長平章平章子思恭思齊思聖
思誠思明次子謙謙子思禮思義幼子鼎鼎子思道思
問曰傑魯公弟也子四人愿讓諒懋傑孫思正思進思
忠思溫思益噫平原之墓繇郡公得封今始有表焉郡

公之若祖若父名字弗可考隆然兆域則皆在其上而諸孫之與平章同高祖者凡四房猶在平原居平章振興于百年之後因郡公之追榮合譜繫族俾五世之本支橫列旁附將使之孝謹自將益昌其祖可謂厚也已
銘曰

酌酌平原土墳宅舒民用泰寧聿勤佃漁自河雲奔邑屋播逋有變者雖宵衣走途九折其行益南以趨繇毫投汶靡定厥止稅于須城客郢以俟復還于汶以鑄以

耜望彼北河有隆坡陀企馬音容戰兢弗磨衡門之棲
韜精養和曰我此有籍我墓伊何戒而孫子勿忘勿圯
番番魯公樂道趾嫩允也魯公不銜以試藝而黍稷亦
有魴鯉遨嬉大耋訖用壽祉篤生平章為國之梁夸毗
弗師佩瑀秉璋諤諤蓋言百壬避剛始事東宮宸高偃
讓告疾遄歸厥聲四揚魯公在堂曰汝來庭國恩靡效
慎其寐興汝車疾驅我餽斯寧鴻化惟幾靖希隆平勿
忿以媚勿喜以矜帝曰汝嘉庸過南征乃晉平章袞衣

具榮視品追秩三世是錫平原之塋松栢茂植維高維
曾爰勗懿德寸雲敷功下土霈澤嬋媽祖芬肅爾承翼
合宗別支秩秩母素瞻彼中林王氏之本匪祖曷思匪
譜孰辨春秋墓門蟄蟄在巖紹聞象賢繩武以昌平章
之心孝思不忘刻銘先塋久載用光

邢氏先塋碑

邢氏世居彰德安陽之交口村金亡大姓散走譜牒塚
墓軼塞率高曾莫能考名字維邢繇酒使君始著君諱

植字子實幼隨父母竄處林谷親疫死從兄林歸里力
樹藝自給厚德卑讓以先業奉其兄後居城中蓄善貨
取贏頗以財自振尚義急賑兄無子訖盡力治生死每
曰嗇用近禮愛物近仁執信守常吾何慊焉坐肆中有
客數人貿鱸於肆有白金遺焉追客莫及明日客至君
先授之客曰果有遺不意在君所誠大長者相謝以去
庚戌歲火災郡蕭侯率民携綆出力用命不可滅至君
舍乃反風侯敬禮之始以推擇為酒使歲終第籍上府

竄戶無所納乃悉以已財補輸之書券於君者毀不問
後不肯仕鄉閭化之至元二十四年三月二十有二日
以壽卒于家年九十有六初娶李氏繼楊氏李生子曰
德裕字裕卿風度皎峻展拓所行整暢為儒吏擢本路
錄事路隸某王分土俾復為酒使至元四年銓選格行
授將仕郎博州路錄事遷潞州判官再遷從仕郎陽翟
縣尹又遷承事郎藁城縣尹其莅博州調征南軍不使
富民委役於貧潞州有疑獄立剖之而讞陽翟獄尤著

民王氏有婢竊其簪珥酒壺以逃盜不可得註誤相連
坐乃密詢其素所往來或曰王氏姪誘婢他之度不可
俱行因殺之以利財後卒獲其姪一訊輒引服縣人大
驚爭持酒殺以賀在藁城會真定無極縣軍隊長匿戍
卒鏹二萬五千緡偽言室中夜遇盜告于官三年不能
獲捕盜官多受罪挾疑侶坐獄者三十餘人府以白樞
密院咸曰是能決陽翟疑獄者檄君以問入其室左右
視驗實無有盜跡呼其孥二人別居之所對皆異辭遂

直入其室發床下軍鏹咸在即日獄具而君以二十九
年六月一日卒于官年六十有七初配王氏再配郭氏
皆葬于交口之祖塋有子五人長曰秉仁字仁甫曰秉
義某官曰秉禮曰秉智某官曰秉信女四人皆適士族
孫七人女孫七人仁甫始由憲司筮仕入掾臺省兩為
太醫院行省都事鐵冶正副提舉一再為二千石治撫
州興學禮士盜不敢入境治廣平亦以善理冤獄有能
名郡民立去思碑以祝之今以嘉議大夫禮部尚書致

仕于家而橐城君卒以尚書為提舉時推恩得贈朝列大夫騎都尉河間郡伯王氏郭氏皆封河間郡太君尚書之長子溫字孟直更迭省部繇御史徧歷中書左司官諳習故事而克謙慎修以禮度自處今授亞中大夫大名路總管將之官致尚書公之命曰父子俱受朝廷殊遇列三品夙夜兢惕實為先德淳蓄再世以昌恩後人徒知邢氏之盛而莫知二祖之勗善培本者若是願刻諸墓上因子銘以昭示于後乃銘曰

雲雷之交經綸靡寧上降下騰甲圻是承劬儉于躬不
企其成蓄極斯泰夾夾振亨折獄探情罔用口才嗇以
裕衆茲惟艱哉維子維孫享其胚胎仰俯橋梓播美益
培霜雨濡降永思彌虔詔而後昆絜其簋籩仕以飭身
止以樂全過者必式茲為邢氏厚德之阡

任氏先塋碑銘

青齊繇尚父啟封土沃民阜擅魚鹽之利山水險阨雄
偉冠鄰壤昔時宰輔願優逸自便者爭乞守是土勝槩

見於職方氏數千年盛矣劉豫猊父子背宋以千里赤
子驅為兵徒犯順滅德金主悟其元惡傳旨就戮而青
齊戶口物故過半完聚未幾李壇復懷逆抗拒齊部所
領益莽為墟落痛矣哉任姓世著滕州傳緒益遠有元
帥府君諱杞又諱宏府君為遠祖葬于薛河源宏有七
子擢文武科墓碑燬落今繇元帥府君始可譜府君娶
王氏二子長曰銳金武舉進士終千夫長次曰釗字某
幼長戈革駕考古今成敗以進取自任鬱不得志持素

所講習訓導鄉黨陳義抑惡片言總榮恥薰受以化咸
曰繫任公所成就郡縣以其行舉于朝辟行軍總管再
舉沂州臨沂令皆謝疾不就始繇沂州歸于滕築室祖
墓一日蔓火燎于野逼墓次公號泣伏墓所有頃火繇
它行郡嘗上其事府君曰吾得歸故里守丘隴奚外慕
焉美鬢善容倜儻以隱逸自傲至元二十四年九月六
日年八十有一卒以孫貴贈樂安郡伯娶周氏贈樂安
郡君三子長曰榮曰滋曰英榮繇元帥府知事陞閩海

道提刑按察司經歷以不樂入嶺嶠改授廬州嘉興總
管府知事善心計仕泊如也以子貴贈某官樂安郡侯
娶單氏贈樂安郡君生子四長曰居敬善吏事所至有
能名為建康

闕


路總管今以通議大夫禮部尚書致

仕娶王氏樂安郡夫人尚書子擇善承務郎樞密院都
事執善江南諸道行御史臺譯從事女三孫三曾孫三
曾孫女一曰居禮房娶李氏七子師善中政院管庫兼
善泰寧路司獄思善蚤世明善進善悅善從善始學仕

曰居仁房居仁為鷹房總管府經歷娶王氏馬氏志善
適善達善宗善曰居義房娶丁氏伯善性善友善合子
孫與曾孫四十一人郡伯次子曰滋房娶李氏生子四
居安居信居寬居誠合孫與女二十一人郡伯季子曰
英房四子居實居慶居厚居德合子女十人嗚呼繇府
君至于今凡五世通其譜幾百人世莫可儼豈非其孝
感于鬼神蓄極以通故仕者振于朝而其未仕者各相
勉思繩祖武以自顯匪表于墓則曷以彰盛德擇善深

湛雅思見事不苟與桷同備屬翰苑厚善而尚書亦屢
瞻其儀度俾有述焉奚敢辭銘曰

滕薛之間任國首封傳於東都齒秩有崇禮食是問邈
其遺風泱泱三齊絲泉沃豐執智秉機厥俗攸同允也
府君厄於兵難閱詳興衰訓言間間左閭右塾化其恇
姦隱身墓廬以號以攀仕不强希榮恥莫干雲藏靈淵
磅礴鬱朝躋于陵百谷涵溢德盛莫居子孫秩秩聿
來墓門展祀芬苾叙昭辨穆孝謹罔失



清容居士集卷二十七

欽定四庫全書

集部

清容居士集卷三

三至

詳校官庶吉士_臣張溥

侍讀_臣孫球覆勘

總校官降調編修_臣倉聖脉

校對官中書_臣李鎔

謄錄監生_臣張亨

欽定四庫全書

清容居士集卷二十八

元 袁桷 撰

墓誌銘

翰林學士嘉議大夫知制誥兼修國史趙公墓

誌銘 代院長作

大德七年正月辛亥翰林學士趙公晦叔卒于官其年
十月中書右丞相入對天子曰趙與票事世祖皇帝幾

二十年事陛下亦將十年敦確清謹今既死無以歸骨
于里敢奏以請於是天子命有司賻緡五千復給舟車
傳費俾其喪歸將行孟實等以狀來請銘復往歲直翰
林公為待制其叙遷也亦相先後知公尤詳義不得辭
方至元十四年間公以驛來朝深衣幅巾見世祖於上
京冰澄玉瑩詞氣整朗言宋亡根本所在親切感動世
祖傾屬自是入翰林為待制為直學士累遷為真學士
公之為侍講也言江南箕斂急督移括大姓宋世丘壟

暴露皆大臣擅易書詔明旨又言庚寅歲大霧蔽塞正月甲辰虎來西城其徵為下臣執權簸政言雖不行而公閉門待罪後司徒公偁同列諭意始復入署公每視職清望近思欲以言議質直理道確近條縷報上故所言嘗若剴切無隱而世祖皇帝沈幾先物神量莫測或為公懼至平章政事不灰木公為公奏私負歲積皇帝曰得非指故臣為虎者宜官酬其逋別給廩粟布帛以養由是始知君臣相與昭合明著如是曾祖伯洙宋朝

議大夫知南外宗正事祖師雍宋朝議大夫直寶章閣
考希聖宋宣教郎史館校勘高祖宗正某南遷時丞台
州黃巖因家焉伯祖師淵與朱文公纂次通鑑綱目凡
例微言輿語耳受身履故公所行尤近嘗與許公仲平
論伊洛閫域首言力行致知清簡惟高沈默自秘皆東
南極弊文以顯道捨是無以議許公深然之至觀公待
人愛士恩禮周洽不為疏數翕訛其持家簡泊無復商
榷計慮非深知道者不能也天性孝友自宗正而下四

世力請于朝而復其役贖姻黨男女為奴而不能歸者
凡十有一人始登宋辛未進士第為鄂州教授由鄂來
京師迄為翰林學士知制誥同修國史積官至嘉議大
夫年六十有二其所成就不為甚過而公以榮祿豐遇
為可愧不獲老田里為可恨噫公之心如是而已矣初
娶夫人舒氏不一歲卒歸橐中裝于婦翁不取今夫人
史氏三男子孟實以公為侍講時特官為承事郎同知
瑞安州事孟賚温州路蒙古學教授孟貫將以廕入官

以某年某月某日歸葬于黃巖塔山之原復嘗讀大雅
文王之詩曰商之孫子其麗不億上帝既命侯于周服
侯服于周天命靡常殷士膚斂裸將于京以知文王之
德之盛商士之恪謹溫遜篤承天心維我世祖明德造
邦式混區夏内外小大共為帝臣而公陟降左右承賚
接錫終始若一至於不幸而死今天子復申命而寵綏
之則公死猶無死也是宜銘銘曰

祿不斂贏謀不課利我以其拙彼以其智衣敝策驚內

澡玉雪誦聲清泠鏗出金鐵蹇蹇九關壬人殞寬維帝
有訓四方于聞之身云亡之德不爽丘環麓茂一息以
徃繫碑之豐維時之通尚詔後人以封以崇

奉訓大夫昌平平等處屯田總管贈亞中大夫永
平路總管輕車都尉宣寧郡侯劉公墓誌銘

太祖皇帝沈幾整武蹙金踰南迺肇定中原物土萌蘖
橫出迭變莫能稱上意將草芟而獸蒐之久而曰噫吾
赤子也始料其民俾執藝丕作故家大姓爭占籍自詣

遂得脫鋒鏑野處以居飭材辦器咸精其能而人益效
用國以富強猗歟盛哉故昌平屯田總管劉侯之祖仁
時為金軍器局副使治于汴至是率其屬徙北以行副
使之考秉文家河南世儒族讀書通大義審金將亡兩
河大饑家故饒傾所積以食餓者或曰歲荐饑宜善蓄
以俟府君曰國迫民流旦夕當走守穀可乎守子孫可
乎後副使繇燕居宣德奉府君以養終葬于宣德為祖
域首焉副使隨軍而北也諸匠官所領道亡過半獨副

使整部伍工作皆完繕帥大人奇勉之曰吾當入白上
擢以美官卒俾見太宗皇帝授諸路人匠提舉後陞總管
以終其配馬氏故涿郡馬令公之女孫男三人長伯英
雲州判官季伯豪安平縣尹仲即昌平君諱伯傑字巨
卿習土俗騎射尤善諸部語言初從其父至大興見尹
郭汝梅郭以能理劇知名善鑒識一見即命佐麾下使
候賓館使者鞭帽駢集指畫不可辨能悉其語意周折
省約使各慰謝以去尹益取自近壬子春憲宗獵渚州

柳林尹日扈從治供頓一日上問尹近郊歲入州戶籍多寡尹愕謝莫對輒從旁具對甚習上喜顧侍臣曰是人宜為官官寧有不能會供應官忤旨受誅迺授警巡院判官即不避署事先白所司言京師號賈區奇貨善物可立致官減其直歲盡且不與雖百置市令無益卒如所白而官取需始輯秩滿府咸曰捨劉君孰使遷本院副使再遷院使歷院四曰大興宛平易縣樂陵循撫慰煦倉卒泛索不假氣色卒不使煩擾事益以理古言

京師號難治若內縣得一善滿輒蹈足以去君所為官
凡七遷皆畿赤繁職使忤貴近一斤不復上驅民迎合
將促數苛擾曷得更取迭用以自顯若是則其治狀可
無愧矣其治樂陵也鷹房數百人從旁縣來糗肉滿馬
尾意樂陵可稱意讀令諭之召其首曰使果犯誠不貫
汝卒避去推樂陵所為政其治他縣與府院蓋可知也
後為昌平路屯田總管積官至奉訓大夫卒以至元二
十三年四月某日年六十有五其葬在大興縣招賢鄉

烽臺村之原男六安易縣尉蚤世弼監太倉支納致事
裕宗皇帝年勞補官積遷中大夫建康路總管府事佐
承務郎同知深州事敏從仕郎深州判官敬承事郎藏
珍庫使女三長適幽州賀進次適承務郎尚舍監丞蕭
某次適蒿州判官田從義孫男九可大將仕郎同知馬
籠州事可久蚤世可浩崇祥院尚印可任幼侍東宮進
義校尉行篋司藥局副使可復可真國子生餘尚幼孫
女五長適安平王某次適幽州郭炫保定于傑幽州朱

棟蔚州宋某延祐中贈典行致官三品得贈二代始追
封亞中大夫永平路總管輕車都尉宣寧郡侯夫人宋
氏宣寧郡夫人而祖父亦贈中順大夫宣德府知府驍
騎尉宣寧郡伯配某氏宣寧郡君楠往與太常博士楊
君宗瑞游過其塾見劉氏諸孫齊襟受經雍穆有度而
建康公禮法自持未老倦游肅然以門戶訓勉今觀博
士行述儒素之積實絲河南來禮不忘其本遭時熙明
將於是乎振遂不讓而為銘銘曰

巍巍元后成玄功鉦戈誕指中州從磨驚鼠竄耄與童
土金石木獸草工各飭攸職程作供徙彼儒族漸勁雄
敝甲奉貢朝紫宮語言清琅縵耳聰指掌代對剖臆胷
天府赤縣更選庸賸瘠獷伏氓顓顓游刃不缺至理通
大椿靈根壤墳豐美蔭蔽芾宏闕崇饒銘堅珉德彌隆
將仕佐郎信州路儒學教授陳君墓誌銘

大德丁未余供奉翰林與廣信陳志仲游粹然以容慎
密不妄言間語昔時祖子孫家慶故事志仲莞爾言曰

吾大父迪功君大母程夫人罹兵難時年七十餘我嚴君衛鄉保入侍二老人嬉戲盥饋奉禮如昔迪功君年愈高別築華山梅堂以奉益不復知有世事于時諸孫實五世矣迪功君號南隱翁翁終時年九十有四方南隱翁無恙時諸父皆逝唯吾老人力整門戶訓兄弟子後以儒術興者凡若干人幸為我記華山焉己酉歲秩滿南歸余師剡源戴先生教授信州亦還言廣信多郡博士獨陳博士溫讓材智篤素慎行為第一方有司急

庸調徵儒生幾二千人能力言而盡復其役汝官京師
有名敏學字志仲者其子也與之游乎未幾志仲以信
州教授致仕命歸榮其親後為宮師府司經典籍稍遷
太常留錢塘遇之則又曰吾親年七十時嘗為書授敏
學曰年至而仕非古也壯者必仕仕不求祿養吾視大
父年不敢跂幸氣血康完若二兄恂恂善持家勉若以
仕勿懼也皇慶癸丑余復入史館志仲則以太常舉將
為博士冬十有一月訃至凡所與游者皆入弔越三日

凶服踵門泣不能言以國子博士虞集之狀授桷俾為
銘君諱萬里字德甫弋陽縣人幼善屬文長從工部侍
郎韓公禾學詞章起居郎徐公直方受理學謝公枋得
張公卿弼植志節咸淳癸酉薦于鄉後起家廣信書院
大修燕居堂面帶湖立諸生論古今成敗道理遺言微
旨文質益損皆口授手畫諸生不忍去請于官留帶湖
凡十年南隱翁卒學者咸會葬焉雅性寬厚善清言與
人交久而彌篤歎歲疾札發粟施藥以全活家多書讐

證成善本謂諸子孫天佚吾老吾遺爾書守儒為準守
身為本餘何言哉壯歲慨然慕詞學故於章啓語尤精
噫方宋文治時立博學宏詞科番陽三洪公周文忠公
迄致清顯至呂成公真文忠公闡正學彌貴重真傳諸
徐鳳徐鳳傳諸尚書王公應麟公曰中是科者實有命
晚歲問難無以承諸生徒自辱爾桶聞是語愧汗累日
今幸與志仲交意謂從廣信山中論竟斯道今不可得
矣屬續之日戒勿用浮屠事實以九月某日卒得年七

十有六以某月某日將葬于永年鄉之吉田曾祖謙道
祖應隆考文光即迪功君也長子誼次天驥皆為郡學
官先娶程氏出次敏學將仕郎太常太祝今方氏出女
三長適方晟次徐某方天祐孫男七人長師中第五
孫宏為大都路儒學錄孫女五人曾孫女二人楠嘗謂
士患不得名巖居谷隱一時推可多任俠尚輕重若先
生者休然養名平進安時鄉閭化之郡縣企之孫曾承
之歿有餘德古所謂鄉先生者陳氏之門見之矣是宜

為銘銘曰

日勛其躬以濬其逢不逢樂天脩齡以終帶湖之徒來
會幽宮彼冽者泉樹之青松而子而孫慎其延弘式昭
墓門百祀弗窮

陳士直墓誌銘

咸淳三年浙西提點刑獄戶部陳公卒大臣以公清直
挺著特官其子嵩伯是曰貴白甫有子命名長曰紹廉
季曰紹庭廩言清庭言直也壬午歲余過奉化入其里

居拜戶部夫人于堂下退揖貴白甫于賓次識二子焉
其季紺頂斑襦眉目刻成熒然碧光流几席稍長羣諸
生誦聲琅圓端默絕外嗜又十年貴白甫居徙江許復
入城僑館則季已加冠字曰士直神益完貌益整肅客
侍立無倚怠退具醪茗動中周折不復俟指顧間從士
直坐書室鉛黃森錯卷帙整束受業退暇琴清筆潤花
竹手植如幢列人咸曰誠有子桷則曰是宜壽且傳噫
世胄彫繭夸者馳侈靡卑者淪頽仆幼儀雅言耳目不

相接垂三十年脫有能自樹植皆野人窶子椎魯不入
繩墨獨士直以故家兒接受薰熟而貴白甫身教簡易
故人皆愛士直靜且和足以蔚其宗余亦愛士直將挈
而克之使益有令聞大德丁未余官禁林有言士直遵
海東游京師遲之不復至己酉歸里貴白甫泣且言曰
吾紹庭甫壯以九月某日亡矣其死也遺筆叙訣無他
語獨屬兄置後以慰父母明年春兄果得男曰鑄配汪
氏遂育以成其言葬地在宅西嶼山以辛亥十有二月

某日定俾楠銘謹按官譜曾祖諱某宣義郎致仕贈朝散郎
祖諱肖孫朝奉大夫戶部郎中浙西提點刑獄嗟夫世患不
能持身既壯且脩振衣康莊御轡遠騁其進莫可止輪掾軔
敗卒歸于命貴白甫秉德師古迄逢不淑莫紓其悲以貌期
稱余復失之天乎是果不可知也庸銘以慰而翁銘曰
有燼者珠復沈于淵云誰尸之蒼蒼維天雲乘嶼山兆
食歸復詔而兄子以衍以續

戴先生墓誌銘

先生諱表元字帥初一字曾伯世為慶元奉化州人七
歲學古詩文多奇語年十三即加冠入鄉校從里師習
詞賦輒棄不肯學諸父強之迺游臨安于時新安方尚
書逢辰廬陵劉博士辰翁以論策表厲進士得先生程
文大奇之咸淳己巳入太學改歲以三舍法升內舍生
又踰年辛未試禮部第十人登進士乙科授建康府教
授越乙亥歲由建康歸遷臨安府教授行戶部掌故皆
不就積階至文林郎大德甲辰先生年六十一矣會執

政薦于朝起家拜信州教授秩滿授婺州以疾辭至大
庚戌三月卒享年六十有七先生在建康時先處州通
守是邦朝夕互還往先生眉目炯聳慷慨自奮欲以言
語筆札為己任嘗曰科舉取士弊不復可改幸得仕矣
宜濯然自異斯可也後二年失仕歸剡遂俾楠事先生
始盡棄聲律文字力言後宋百五十餘年理學興而文
藝絕永嘉之學志非不勤也挈之而不至其失也姜江
西諸賢力肆于辭斷章近語雜然陳列體益新而變日

多故言浩漫者蕩而倨極援證者廣而類俳諧之詞獲
絕于近世而一切直致棄壞繩墨勢爛不可舉文不在
茲其何以垂後先生深憫焉方是時禮部尚書王公應
麟天台舒公岳祥師表一代先生獨執子弟禮寸聞隻
語悉囿以為文其文清深整雅蓄而始發間事摹畫而
隅角不露施於人者多尤自祕重不妄許與晚歲翰林
集賢以修撰博士二職薦論而先生不可復出矣維先
子與先生總角相厚善暨先生登進士年盛氣邁故舊

貶抑者不敢自進先子正色相輔復以不肖孤托于先生誘之迪之獲不失其身往歲解官南歸於是先子捐館踰一紀矣先生始愴然曰先公之德幸勿墜嗚呼朋友道喪久矣過時而哀痛實何敢忘自昔孔門首分四科歷代之士率不能兼有尊德行者後文學世嘗病焉先生為文尤多於忠厚孝悌之語後之纂言者其必有所考夫文以蘄遠果能遠矣而近者五六十一年或止百餘年其不幸者又皆為水火燬沒亡紀使誠盡傳也則

世有能名者不一二數然視今世焯焯所傳又皆無是
事噫傳與朽始固不論也曾祖辛妣劉氏祖汝明妣鄭
氏考灝妣王氏世多儒科伯祖杰端平初為宗學諭篤
厚為時輩所尊先生詩文若干卷疾革猶手加繕定以
所居鄉名曰剡源集治窆張村葬以至大元年三月某日
娶陸氏子男四初陽次紀後庚幼儒女四壻曰陸孟孫
孫肖翁徐公說袁庚孫孫男女八始先生兩授徒于鄞
于宣于杭其徒散處莫會初陽等謂從學最久而知吾

父者宜莫如楠遂俾誌其墓迺泣對不敢辭銘曰

桓桓戴系立氏以謚信都九江集禮秉衡在漢國鈞守
正忠毅別籍于剡貞德彌勵琅然孤桐不諂其逢浩歸
衡門邈焉冥鴻二季重輝續其高風箋經暢隱雅言春
容厥壤犬牙旁邑是著方門之支本茂葉附展世斯赫
宗黷攸輔詵詵餘慶聿踵先武振聲鋪華先生是承有
燁者光不竦不凌在泮莪冠掩耳以行曲裾長襜祗繫
其亨千塗競謚一轍交走正歧前驅白首莫疚發其粹

精如瘠脫口如轡在手如藥在肘屢蹟于艱秉禮益閑
有泉潺潺有佩珊珊駕言東游曰知者天卒昌其文以
終丘樊張原之栢先生手植彼高為南彼鬱者北告而
嗣子以順以則昭銘墓門過者必式

周隱君墓誌銘

先王盛時以三物教民六行之不修則設刑以糾之是
六者切於人道之日用故嚴以為之防其理然也降於
戰國彘倫益斁孝友著於列傳擁強貨持短長縱恣郡

國作史者復傳其事豈誠有激於世乎納粟之令行虛
文益張實不見於鄉黨執筆以揚人之美不偽則佞吁
可懼也矣廬陵曾君巽申與桶同在翰林狀其姻家周
隱君之行曰君諱天錫字極翁吉安路安福州人曾大
父大成大父宗元平實自持以累舉恩授迪功郎臨江
軍新喻縣丞父九鼎篤信行歲饑能損粟直以售遇朋
友急厄傾貲解援裕如也年內翰領史事將薦以自近
後不果文丞相信公靳許可扁其齋居曰信太學博士

劉君辰翁實銘之是生隱君嘗以詞賦上轉運所江丞
相讀其文奇之事親盡孝侍疾治喪悉如禮以遵父志
其待於族姻洽於鄉鄰者彌有廣焉性不事表襮勸之
仕謝曰吾求全吾初遂因以自號至元二十九年十一
月年五十有二以卒娶蕭氏男長孺將仕郎征東等處
儒學提舉孫男三福祺祉孫女四延祐五年四月甲辰
葬栢溪之橫原讀其狀則知夫厚德之延非一世繼志
紹聞久而彌光泉寢於山木生於地磅礴鬱積有自來

矣君之遠祖廣為南唐節度押衙積憲銜為御史階金
紫唐廣明以來有是官曾君平居語不妄孫禎曾堦也
曾之先君監察御史縣桂陽時為湖南主文實拔君為
首選事可證若是銘曰

有錦綢之有玉匱之蓄兮續之是用穀之廬陵之原豐
碑秩秩昭其幽光詞不以溢

楊府君墓誌銘

江南官簿大家運統合一緒墜諜散流降不復可考或

者謂聲聞詭激德不稱名馴致是理味其語淵乎有旨哉箕疇叙五福首次以富終之以考終命而祿位弗叙若是則尸祿位者私善惡喜怒鉤名挈譽幸終其身其禍可勝道哉至治元年余校文南宮得一士曰張純仁廣信人也調鄞縣丞鄞為余里會謁告歸純仁踵門以其舅氏之狀請銘其受氏為武夷楊氏楊繇侍讀學士徽之翰林學士億顯後有徙信之弋陽今為弋陽人其曾祖諱崧祖元龍考汝翼妣三世曰李氏程氏江氏考

能詩有集曰醉吟李君明通叙之君名謙之字謙叔嘗
監麻沙鎮後不復仕其所從師曰謝公君直純仁之祖
教授君某其事親有誣其考以重罪君總角詣庭直其
冤其居室銖黍充牣使善裕其施于鄉損粟直以濟饑
買田以助縣庠其宅南有重巖水石君能專美獨樂之
其娶熊氏閭助迄成其家子三長昭德次拱辰先卒季
進德孫男九孫女六曾孫一其生在寶祐丙辰卒以泰
定元年正月某日年六十有九其葬在武石山噫所謂

五福斯備者歟其自號曰謙山名字與號若不相捨茲其為延永也大矣是宜銘銘曰

世以祿夸我弗企之積小以高莫或躋之峩峩長松美蔭日疏迄樂其全弗替弗踰武石之山固爾體魄爰廣墓門過者是式

劉隱君墓誌銘

五經之學繇宋諸儒先緝續統緒詩首蘇轍成鄭樵易首王洙東萊呂祖謙氏後始定十二篇胡宏氏辨周官

余廷椿迺漸次第書有古文今文陳振孫掇拾援據確
然明白言傳心者猶依違不敢置論至天台劉君正仲
諱莊孫始憤然曰吾不能接響相附和尊聞紹言各為
論著不沒其實而先儒之傳益顯所為書曰易志一十
卷詩傳音旨補二十卷書傳上下篇二十卷周官集傳
二十卷春秋本義二十卷其論春秋為魯史之舊是則
發揚先儒之遺旨喜著書能以詞藻達幽隱復為論語
章旨老子發微楚辭補註音釋深衣考而其所為詩文

曰芳潤藁凡五十卷和陶詩一卷噫多矣哉學患不博博矣其必不能有以精也士生于今會衆以合一由谷而之川川以達于海蓋其書具在獵英聚珍朝成夕上敏而求之者良不以為艱是則於劉君見之君少學古文湛深隱伏不見其涯涘落筆數百語詩工次和愈作愈平順而幽愁感歎思其平昔狀其羈窘鑒燭清澈物莫有逃遁者性嗜酒不解治生業幼侍其父府君昇自為師弟子從閩風舒先生岳祥游唱和不輟空林絕嶂

目接耳受一寓於諷詠晚歲先會稽郡公延入塾教諸甥桷相與論經旨往復不避輩行蓋君篤信周官而不鄙每置議君亦不以為忤在太學五年不善為同輩文字不獲釋褐今其所為書先師尚書王公摠而叙之大德六年十二月某日卒年六十有九娶王氏後七年卒子三長主一早夭次存翁學翁女一適董可傳葬于士輿之龜峯劉為寧海儒族八世祖世克為吳越王錢氏板授官閭風里有二劉曰和叔曰允叔於君為曾叔祖

有文名不大光顯至君父子亦若是今遺書具在詎果
無傳也邪曾祖某祖某妣某氏其子存翁嘗請銘以久
官翰林不克為至是二十有四年矣今復有請愀然謝
曰隱君振華續光將大有傳者舊斯盡桷敢不自勵銘
曰

探微證墜前哲功後學剽襲誣顓蒙偉哉卓識合異同
輪困卷帙浩不窮冥搜玄象歌澗澗弄筆為戲箋魚蟲
辟雍三黜命莫逢紀述有在蓄極通墓門永揭昭儒宗

曹士弘墓誌銘

褒貶論春秋解經者失之作史者祖之則益失其旨矣
宋祚歷三百餘年經國之綱領治迹之盛衰實書以示
後其義自見深文巧避多出其子孫而為國諱者掩而
益彰沿襲不決何以傳信吾友曹士弘甫深憂之蒐摭
遺逸不贅於昔時之議論自成一家其貫穿出入年經
月緯誅其私心附以旁證莫能逃遁桶往歲亦嘗以是
自任故書燬廢不復敢因微言曰帝在房陵豈乾侯之

例邪外大夫不書卒書卒者其是邪士弘甫撫掌大以
愚言為然嘗約吾二人當必任是事嗚呼士弘甫今往
矣以余之識闇志荒不復能有成矣士弘甫讀書目過
即成誦理財養兵禮樂刑政之損益折衷於古經而以
通今所宜行者為之準其見於用也不卑於簿領而志
足以展用取於友也盡其所長覆護以捨短故舉世一
皆以為賢奉親孝事兄以恭訓諸生專席廣說耳聆心
會爭踵門受業後卒致顯仕初為郡史燕公公楠為大

司農辟以自近歷婺州純孝慶元文亭廣德陳揚村杭
村巡檢後入銓曹復授陳揚村揚村父老咸曰是嘗攝
吾里者矣曹君善撫字今年饑必賑我我何之君諱毅
武惠王裔孫五世祖某從隆祐太后辟兵過廬陵因家
焉曾祖某祖某父某有詩集六卷祖妣鄒氏妣羅氏鄒
氏以叔父某太學釋褐恩封孺人所為文若干卷纂言
行編曰鈞玄凡五十六卷疾革命諸子曰必返汝祖母
故塋吾魂氣無不之得地即埋我卒以至大三年四月

某日年五十有二子男五人汝霖今為兩浙轉運司書吏汝舟饒州器資宣州皆以秀才舉馳以醫業入仕幼桐孫女一適劉某先卒孫男女七嗚呼人嘗恨位卑齷齪媚上甚則策功利以求進名在罪籍不自悔王公貴人持與奪生殺身死無足稱道較士弘所負所傳得失為何如也先師禮部尚書王公應麟為文餞之曰闕里高弟冉有用予樊遲為右士弘為此官文武同方之道也侍講學士張公伯淳則曰伯淳官慶元士弘在慈溪

與之友不敢吏朱雲也汝霖汝舟皆能世其學泰定二年汝舟以書抵余求銘實不敢辭銘曰

匏也不食我心孔悲聿求王明以策以馳輪囷知聞如山蔌雲纂史闡名不屑於文緝墜紹緒執筆是紀年不稱德傳世則偉作銘允哀以詔我同志

陳縣尉墓誌銘

咸淳閱十禩諸縣獨奉化號多士流出入太學上南宮亡慮十餘人于時蜚聲秀穎旁縣皆歛手避讓一時傳

誦習讀謂清選不歲月可馴致未幾皇元合一皆失仕
歸里挾策授徒疏糲自給俱不能享中壽子弟不自振
飭復歸為農陳君亦咸淳甲戌進士不自矜褻接幼待
賤謙挹愈加混跡蒿翳不知其為故官而得年且八十
有一有子漢復能以儒自守其視前數公良遠過矣君
諱觀字國秀嘗調臨安府新城縣尉十世祖棠尉奉化
因占籍焉子孫日蕃其最顯者曰太學博士著於君為
兄博士倅貳臨安君館于其家君之考承務亦在館既

策名客館其兄復賀其父人咸榮之晚歲足不入城府
州爭迎致率諸生以請業君一至即謝去徜徉巖壑侍
博士窮幽挾竒連唱屬和有帙曰棣萼集其自為詩文
曰竅蚓集嵩里集延祐五年三月疾忽作猶力書中庸
一章以授漢是月某日卒祖諱某妣戴氏以守節著事
見州志考某承務郎妣臧氏董氏孫男二時說時敏孫
女一已嫁次未行今葬剡源鄉畢駐里祔于曾祖迪功
某之兆銘曰

日垂崦嵫亦既見斗實命不逢怨則屢疚布衣便迄
享大年執其韋編戒子于傳維陳令族詩書是續作銘
昭昭以告必復

靜清處士史君墓誌銘

大德七年楠官翰林史先生以書見貽不獲領後二十
年子壁孫橐其書藁以示反復痛悼策勵于楠為甚重
今撮要而表之曰斯文剝喪餘數十年師表郡縣學者
應格則得未嘗于其人後生不說學亦未嘗知學剔偽

務實而挽之古子宜勉焉非可以虛談異也又曰吾將
死得子文表于墓桷拜手讀之泣然以泣先生於外家
為舅氏猶記拜先生於獨善坊論宦族纒屬文詞顯著
獨缺自吳丞相開新河有相者曰邇後當踵有之甥宜
自重先生於諸經窮探微旨證墜緝缺不溺於詛聞剖
釋正大而折衷一歸於前哲論古今得失必探情偽以
暴其罪正色憤悱若造庭而受其責也為文邃古不雜
異說手抄口講更僕不能以盡孝悌遜讓知其出自然

也先生諱蒙卿字景正生而奇頷秀目七歲善屬文年
十二入國子學通春秋周官經復兼詞賦江文忠公萬
里常參政挺時為大小司成器待之咸淳元年登進士
第授迪功郎復州景陵縣主簿呂少保文德帥鄂檄入
幕呂命先生勉蜀帥溫和解正陽圍溫疑呂猜阻不肯
發微語撼之即就道凡所需器物一夕以辦溫實先公
帳下校却立曰史監軍誠有子調穿山鹽場諭義勸輸
戶不知有箠榷十年改江陰教授復改平江至是不復

仕故其詩文多感憤自喻禮部尚書王公應麟嘗勉曰
思深辭悲學陶靖節其得之維鄞史族號相門曾祖諱
浚蚤夭贈中散大夫祖諱彌鞏司封郎中贈少師司封
以儒學致顯當貴盛時獨卑退自持鄉人稱為獨善先
生妣臧氏華國夫人考諱肯之中大夫湖北提刑兼知
常德府贈太中大夫妣趙氏周氏碩人太中熟邊事折
衝料變有大帥才時宰尼之太中在湖北時謁告歸省
從巴川陽公岳學易春秋一年復歸國學迺中上第士

常患固陋株守皓首不寤先生識足以窺淵懿經緯一
原合師友之旨老而彌實確而不懈故其成就若是自
號靜清晚歲罹厄窮講道不輟從者益衆天台多名山
心樂之僑居者八年大德十年七月某日卒享年六十
疾漸革語諸子曰我死必歸葬不能得資良累汝汝有
志其果能成也是歲十有一月柩歸祖墓明年葬于陽
堂鄉穆與之原娶陸氏朝請大夫將作監合之女子璧
孫墓孫坐孫臺孫女伯仝適葉信公夢鼎之孫揆翁仲

忱適紹興中書舍人潘公良貴之曾孫世演二女未行
有文集二十卷易究一十卷託永遠於少賤誠不敢承
命歲月逾邁而璧孫能遵守不貳奉遺言以請曷敢以
不腆為辭銘曰

貞絜陸沈志裂金石秉言無郵厄則孰職驥伏于襄不
稱其德塊獨結約忿決胃臆持九障瀾盡瘁不休卒昌
者名屢空靡憂生為完人歸藏于丘有子紹學曷怨以
尤

清容居士集卷二十八

欽定四庫全書

清容居士集卷二十九

元 袁桷 撰

墓誌銘

浦經歷墓誌銘

大德丙午桷與吳郡浦源如淵同佐史局史局總翰林
職清簡屬筆將既輒羣坐臧否今古如淵訥不出口一
日正襟瞪目援酌是否纚纚數百語經史綜錯深切治

道且曰吾家君重然諾慷慨子歸且往見是歲還吳始
納謁焉見其設席尋文車屨沓戶限若絕觴舉輒口數
州郡靡敝事傾耳點首皆僑寓達官奇其言將引以為
他日助未幾授漕運府知事朝貴人偁乘驛來京師昌
言漕計十數事不便朝從其言即陞為經歷壬子歲楠
留吳最久遂益得奉議論痛言田稅民役上下交困乏
將繕治其說於素所傾密者于時以婉語止之曰害不
什一除旁出苛擾殆將重病之君立悟迺止後授黃州

錄事判官延祐乙卯君年六十一矣嘗謂知己多行事
少平時措念挺挺可表著迄莫能自見一有委使排根
抉蠹將欣然盡瘁方受檄推考而卒以疾至大故實四
月庚午也嗚呼成周以三物教萬民降于司馬遷憤世
嫉邪獨致意任俠君周於事物激不近刻任重致遠出
戶而日昃噫幸歟其不幸歟浦為吳郡著姓君諱椿字
闕世家崑山州曾大父某大父某植德潛閎父某貧
而好施君少試吏以曲直視事不肯有高下簡易絕城

府解排糾紛磊落輒自許壯歲恥同凡輩始辟漕運府
史熟其利害府薦于朝為照磨三遷為府經歷晚授黃
州而志意莫遂詎命也夫娶陳氏男五長源以編修官
授承事郎常熟州判官次厚與陳夫人先七歲卒次湜
浩津女嫁同里嚴震孫男五孫女二六月乙酉葬長洲
縣陳塹之原銘曰

璞隱于荆彼士泣之驥伏于車曷予繫之成者匪天為
者匪人不成不為其風肫肫聿昌其始有子文偉高丘

永安是謂受祉

司天管勾焦君墓誌銘

長安焦氏世遠軼莫究宗譜有諱紹先者金太武時始著進士籍生子繼祖為河南招討使招討生餘慶第詞賦科仕至中順大夫雲陽縣令金將亡國勢蹙憤日挈都南徙達官重族棄播不自保雲陽號儒家迺讀建除候占等書察便利生死法為隱避計死未幾有子曰永字某益究術自秘天兵下陝率里閭拏屬二百九人道

金洋入蜀門蜀附定悉完聚歸後家岐陽遂以術顯靈
臺因官馬至元庚辰靈臺卒年六十有八男二榮陝西
四川陰陽提舉顯廣元路歸興倉使女一適輔某孫男
四澤臨洮府稅務大使溉將仕郎同知益良州事渥岳
州路陰陽教授沆延安路陰陽教授其葬在咸寧縣龍首
鄉南岡合配胡氏祔大德丁未孫沆奉集賢宋公所為
先塋碑與靈臺君之事狀謁某京師且曰吾祖不顯于
儒躬邁險艱食藝保緒晚歲聚經史探玩意若有俟性

溫重無忤色紛難急乏力盡不瘁諸父兄嶄然自持承
芬振華挈挈自厲匪我祖先德疇克有賴敢以是乞銘
銘曰

起儒維曾逃艱以承魄藏止止昭爾孫子俾復其始

滕縣尉徐君墓誌銘

君諱之綱字漢臣金以詞賦舉進士君為詞賦有能名
會金將亡不得試作賦說以示學者窮幽闡微合金宋
體指摘昔人鉅作截然不少讓上論隋唐曲盡幽眇久

而曰是果為學邪蓋探道理以河南二程江南朱張胡
蔡為根柢窮春秋易二經其言春秋失始三傳左氏誣
為甚常事不書聖人之旨也易更三聖麻衣誠偽書夫
子十翼功並日月其言與朱文公合當是時南北蓋未
混也意識卓絕尚友於千載其言論金士疑之宋號以
儒立國論亦如君言其所為書東齋默志三卷皆經說
也通融賦說三卷舉子學也麟臺雜著七卷其所為詩
文也皇元畧中原定地戊戌歲始招輯儒士君以明經

選益都于時李壇以諸侯兵分省君以府學教授佐省
事壇喜儒間問攻戰成敗陰蓄甲士習勞苦君講經曰
使民以時相君不知也壇默然又曰平王威烈周之衰
也戰國之士知諸侯而不尊周唐世河北將士尊藩鎮
而不知有唐其言簡直遂黜為滕州滕縣尉讒者復以
默誌羅君禍後壇果就誅而君亦已下世中統四年八
月某日也年七十有五配李氏郭氏嗚呼崎嶇兵塵士
悉以童習自守磅礴河漢橫流塞而天源深非君其誰

邪淄川楊公序其文矣君世家單州後徙濟州祖鐸父
革俱金進士配翟氏子敬至元十三年中明經無祿即
世孫天麟十七年亦中明經次鳳以積勞為益都路臨
朐縣尹今承務郎慶元路總管府經歷次士龍代州儒
學正曾孫若干人鳳靖共宜官愀然言曰祖父節行經
學先哲推重子嘗為文字官願誌墓道遂讀其所為書
以叙迺為銘銘曰

魯聖絕學蕪榛管曲說恣臆紛翩翻浮聲急響曼以繁

青紫決拾靡覩顏夫子勇志開冥頑手持寸膠清渾濶
雲陰駁霽白日還佐鎮陳誼數斥奸拂衣避席彼搆讒
寥寥道統孰異分正轍前趨南北貫厥功茂著儒碩先
遺文傳信銘永刊

龍興路司獄潘君墓誌銘

元貞元年桷掌呂成公麗澤祠于時壽俊有數公能言
乾道淳熙遺事嘗曰麗澤選不輕二潘君真名士子繼
二潘亦僅僅焉大潘君吾里人以介直忿世死小潘君

弼良輔處之麗水人介亦相近氣邁年盛用世必得善
譽子善識之未幾良輔來金華望之魁偉壁立瞪目拱
手廣席參錯未始出半語稍論古事輒躍然纔屬穿貫
握手曰大潘君死吾與子真交承矣後游京師授贛州
教授見中丞崔公議論剴發相感動關絡解剔不為翕
翕附中丞喜聞四方利病即奏授廣東廉訪司管勾架
閣兼照磨是後余亦入為太史屬臺使者旁午入奏事
咸言良輔有御史才廣東副元帥囊橐峒寇稍廉察即

縱寇搖動斂手弗敢問遂悉發其奸蠲德慶路官逋糧
三萬石劾具幕長不法數事聞于臺立罷之監司欽察
公悉付以事副帥益鬱怒誘引亡賴誣讎會省臺停其
職而以君劾罷者復所居官未幾御史言論劾者罪著
不宜復然君卒以是去江南行臺御史列署薦君宜久
任憲職于時崔公已已即世不復任君矣大德十年復為
贛州教授以昔之治廣者為準闢田築宮訓士嚴整力
請于官而復其役皇慶二年授龍興路司獄不卑其職

悉疏宜行者以盡心焉部使者佟公憲府舊屬命治佐
創專利者凡得八百人悉除去之會佟公去官不逞復
以他事相誑誤強訴者引君然君自是抑氣不能食以
死嗟夫士患不得名名與謗常角立昧昧後福善不近
名誠有為而言也若是者君幾近之矣君族祖父曰叔
豹曰杞世儒科皆至二千石曾祖恕樂道不仕大父屋
太學進士修職郎平江府吳江縣丞父應發薦于鄉文
行瑰偉士尊稱之君幼孤母項氏招師教授俾植立其

為文辭浩漑勢盛衝激巖嶽風止瀾靜卒不露飄泊其
善養氣者與所為文號宜山集若干卷讀易管見四卷
詩一卷藏于家元配何氏子二人曰龍吉鳳翔女三人
長適常鑰次林定老徐天祐再娶陸氏子二人鼎臣衡
孫女一人適林銜三娶陳氏女二人尚幼曰昇曰鑑皆
庶生孫男女各四人君卒於延祐某年七月某日卒年
五十有八楠在翰苑時嘗以君薦于承旨程公程公曰
吾固知之得無以南士累乎相笑而止至治元年二月

承徵至京師預考禮部進士策名得林定老後登上第
授奉化州同知定老踵門拜且言曰潘君實婦翁先生
嘗知之矣將以今年八月庚申葬朱溪祖墓敢以銘請
又言婦翁嘗從先人先人卒定老生未周矻矻撫字終
以女妻之繇是悲且歎曰師友道喪久矣是尤宜書銘
曰

長紳我冠日出脂韋莫窒其逢委蛇以嬉白駒在谷不
屑不辱決臆過都孰繫其足生人匪艱成之實難九泥

障流彼駛者繁氣直以堅維德之完謂隘不由其名奚傳

江陵儒學教授岑君墓誌銘

慈溪黃宗卿震之季子叔英彥實甫壻餘姚岑氏咸言岑氏善擇壻彥實館其家以詩書授子弟彬彬于于鈞深纂玄融液品節各就條貫掉鞅於詞場者尤宜焉延祐五年岑君良卿以詩義上禮部第二桷時為殿試讀卷官定甲乙七年其弟士貴貢于鄉桷以至治元年再

入集賢預校文選詞賦工者擢前列暨拆名則士貴也
國朝治定踰百年始立科舉江南行省有三而襄郢東
西淮之士亦隸南選三歲止七十五人登名上于庭者
三黜其二岑氏連取之盛矣哉論德考實必推其前人
士貴懷牒南歸以其先府君之狀來請銘君諱翔龍字
雲起踰弱冠即起家為高節書院長調和州教授又調
江陵教授幼警敏能文辭性慕高潔以禮自持植廢舉
缺罔有怠事鄉里稱孝謹事大府能使貴盛者咸愛重

之大德九年卒年四十有五吏部教官格年踰五十始得入州教授州不滿三十而接踵嘗數百人十五年始得授且守缺近三四年遠至七八年故多不能食祿而陞于路者非耆年則下世矣君以盛年徧歷蒞于民不得年以沒前佚後窒若有憾者未一紀兄子登進士又三年子亦進士較其得失是則亦奚有憾焉也矣娶王氏先九年卒子男五文仲朝瑞為伯父後士貴今授某官季德盛楚村女一適鄴范某至大元年葬於上林

鄉召輿之原古者銘藏于幽後揭於墓道懼人之弗先見也禮生於人情弗忍焉耳矣迺表以銘曰

蒼姬展親岑亭啓封棘陽專居傳漢益隆矯矯舞陽佐運闡功後興儒碩錮禁以終定籍會稽支居鹽官三相佐唐偉績彌刊或鳴以詩載車和鑾降宋中微其譜實完蹇兮在山不駛不僨卒達于川百折混混孰導其先孰開其蘊肇者不居來者益振執券獲酬雙璧是陳載考令德其馨網緼我銘以昭益勵後人

河間清鹽使郝君墓誌銘

君諱從字從之霸州信安縣人壯歲秀整植聲節與人
交不為險薄意拯其急難里人推德之至元十三年為
河間清鹽使副後陞正使治弗煩擾而政日以理始君
從弟彬弱冠事裕宗後為工部尚書官寢顯從之曰吾
郝氏繇大父宛平君多惠政後宜有顯者徵左尚書吾
仕宜已矣會得末疾息心斷家事調佐寒暑力補治策
杖閭里如平時踰二十年嘗謂其子志善曰才能不如

古人擇今世賢公卿如古人者事之斯近之翕赫取貴
艷非進身本也志善從太傅丞相之子大夫游始為北
郊署丞為監察御史而君與世嗒然益若相遺者焉延
祐五年十月某日卒年七十有一噫士患不知命逐日
希影挈挈然不返若君能知止矣而其弟參大政罷歸
閉門幾十年亦不出今拜大司農郝氏之昌殆未易量
也考諱德仁妣李氏宛平縣君祖諱政以參政贈資德
大夫尚書右丞追封薊國公諡康靖妣賈氏薊國夫人配

劉氏二女長適楊居義次適集賢照磨李忠將以十有二月某日葬宛平君墓左御史來乞銘銘曰

始竒終閔覲德日溫訓言衡門不華以尊曄曄大椿灌膏培根弗利其身利其後昆

翰林學士承旨贈大司徒魯國王文肅公墓誌
銘

翰林承旨贈大司徒魯國王文肅公至大三年六十有六薨京師假葬于城東隅至治元年其孤翰林待制士

熙始克奉柩以某月某日葬東平祖塋瓠山之原士熙拜且泣曰墓上碑則父友翰林學士陳公儼屬比銘之矣今葬日薄知吾先公莫若子幸誌其歷官行事納諸幽堂桷不敢辭為之辭曰公諱構字肯堂年弱冠以詞賦入鄉校賈文正公一見器偉之禮載以歸俾教授其子遂來京師至元十一年授翰林國史院編修官繇院中叙遷應奉修撰陞侍講進翰林學士訖承旨佐丞相府為司直歷吏部禮部二郎中太常為少卿於臺外江

北淮東道提刑按察使副內治書侍御史入省參議中
書省事復出守濟南公之在翰林也辭命詔令多所撰
述其最傳于朝者曰世祖皇帝謚冊追謚太祖冊武宗
皇后冊於實錄預修世祖成宗兩皇帝定武宗上尊號
親享太廟儀在太常考輯因革有叙其佐丞相府剗剗
蠹弊更始選士丞相齊魯公信從之為治書時值桑葛
擅中書政柄嫉方直士檄公偕翰林承旨魯國文貞卜
忽木公覈究燕南錢穀約一月治辦公先事計畫不以

累魯公會桑葛誅迺得免其按淮西不切切近名而吏亦不敢慢事治吏禮二部無缺緩同列見公署事不復視成績以行參議府六年一時執政聽南士陳利便搜括田賦時平章政事何公榮祖與公正色不少讓摧萌折貪卒俾其謀以寢始天兵平宋詔徵賢能李學士槃同受旨公至杭首言宋三館圖籍太常天章禮器輿仗儀注當悉輦歸于朝董趙公文炳從其言今宋實錄正史藏史院絲公以完守濟南寬貧民官道修閔子祠復

學田觴詠自娛而訟益以簡承旨李公謙幼師之遷應
奉卒推以先始受命勤敏通博一時鉅公皆屈已期獎
後卒與相並史館辟署亡慮數十人今相躡清要皆門
下士其為文開閭詠諷落筆纚屬不止於王言為尤長
臺閣故事資公始能奉行事兄戶部侍郎桓如嚴父惇
嫻睦宗在中書迄不肯私其親人益伏之同里陳公儼
為孔顏孟教授年幾五十矣入徵拜監察御史未幾為
翰林直學士蓋公昔嘗薦之王愷年七十為編脩官公

請于朝以待制致其事資歷循叙銓衡所宜守文字官
陞擢詔旨具在後為繼者緘口不薦一士視公誠可愧
也公之系繇琅瑯居東平自八世祖為宋司農卿守鄆
因家焉曾祖瑀登金進士第官奉訓大夫滄州無棣令
妣范氏祖鐸以公官承旨贈正奉大夫太常太卿妣杜
氏臨沂郡夫人父公淵贈昭文館大學士資德大夫妣
薛氏瑯琊郡夫人昭文當金亡時有兄三人攜妻孥南
徙昭文私自念王氏大墓盡族以行孰與守下車伏草

莽兄呼其名第不復得後騎迫大慟以去昭文傭保自
活迄全其墓厚德勃興於公見之矣娶薛氏魯國夫人
是生士熙再娶許氏皆先卒晚歲得二子士點士然女
一嫁薛晉士熙能文辭有聲將大用於世推薦賢之功
王氏殆未艾也銘曰

德充智周世莫與儔士林之標獎士無方譽髦珪璋孰
阮其遭文鳴盛世金石雜比厥聲四昭子也允文戰兢
紹聞嗚呼乎公之名益以高

磁州知州程君墓誌銘

程君諱翔字鵬舉以孝友聞于州里後其子若弟官江南恂恂愉愉夔然異衣冠常流於是江南之士族咸取以為則嗟夫世降俗媮能竭力以養者有矣友于之乖君師之嚴不能以尸化若程君者發於良心成於身教是宜揭豐碑以昭示薄俗按其狀曰世家廣平大墓在城西南兵難譜軼獨記其父名約是生三子長即鵬舉仲曰翱仕至僉浙東廉訪司事叔曰翼吉州治中二季

以宦業表著皆君之教君綜家治生服其勤勞俾弟悉
意問學聚書延師靡密叢雜一不使亂意弟則曰匪我
之能維吾兄之成其事父承接意旨日侍食俟可否或
却食即不敢食懷甘割鮮斥幼者避席以立佐治湯液
時其寒燠卒能以上壽終既除喪謹上冢禮修誠厲行
分寸不使越繩墨鄉閭尊之昭文學士張公孔孫集賢
學士劉公孫曰吾徒不能以卓行薦諸朝是誠有愧年
七十有一卒於元貞二年正月七日葬某鄉娶張氏子

四良弼良輔良佑良佐君疾革呼諸子曰父死異財違古禮慎遵我訓若君者懿德斯備而復以囑其子程氏之澤良未艾也良佑始仕在中書右司歷參議府戶部宣徽院改授太常太祝出為鎮江常州推官浙東道宣慰司都元帥府都事甫解職以選守令授奉政大夫上都路興州知州孫十人孫女九人良佑來請銘君弟之子良能松江府橫浦場司丞良士溫州路永嘉場監運亦曰伯父事實將湮佚宜速銘以詔後君以推恩贈奉

政大夫磁州知州驍騎尉追封廣平縣子張氏追封廣平縣君銘曰

惟民初生其仁肫肫摩盪恣情有戾彛倫展也磁州執德養淳奉盈臨淵踧踖以遵陳饌在堂手函脆新候顏以趨厥容孔溫爰用則之施于家人濟濟鴈行厥聲四聞永裕是嗣振于朝紳城南之塋有大維椿爰勵薄俗表茲堅珉

榮祿大夫大司徒特進饒國吳公饒國夫人舒氏

墓誌銘

至大三年武宗皇帝廣孝錫類以翰林學士中順大夫致仕吳公克己特授榮祿大夫大司徒封饒國公妻舒氏饒國夫人夫婦同日受封其子玄德真人玄教嗣師全節歸饒州安仁縣下馬入里門奉制書跪堂上二老人却立望闕拜命誠躋軼前古延祐元年壽八十仁宗皇帝遵先帝故事錫上尊文錦以尊顯之表署宅里榮耀極致人子之崇侈其親者茲亦備矣玄教嗣師實開府

大宗師張公留孫之大弟子延祐六年公與夫人壽八十有五五月丙辰公薨全節號泣不食得請于上倍道星馳以歸十有一月某日饒國夫人相繼即世嗚呼生榮死戚訖同以歸盛矣哉人子之事其親情至矣而養弗能以盡養足以盡而祿弗及者千萬焉貴極於王侯褒追之禮見於墓下則凡通顯之事親者十無二三焉合唐宋譜胄幾七百年具慶僅一二見吳氏之德胚胎磅礴是誠有由來矣喪禮莫嚴於儒者飾情表行哀不

足而溢於禮者多矣玄德力行而兼有之茲難能也至
治二年春全節泣且告曰將以九月某日合葬于崇德
鄉山田原願述我先公先夫人之世系而銘之隧道有
碑翰林學士元公則為之矣古者墓而不墳藏銘于幽
懼世之久而弗知也視其姓名有不忍人之心焉後之
慮其親者則曰立於墓人之見之者不忍矣何藏焉碑
於隧斯敬矣銘於墓斯仁矣謹按番禺易吳氏皆祖番君
尚饒公曾祖岳祖夢闕父鑑追封某官謚文靖妣陳氏

追封饒國夫人公字祥甫卑讓自持不善者避之善者從之身貴矣禮鄉黨以和視後進煦然以獎誘觴至益持重戒其子侍帝左右毋以我耄為往返夫人舒氏諱妙真世儒族祖某父某公蚤事舅姑盡孝敬晚歲主祭享親滌濯遇諱日淚涕滿頤睫內閭姻黨咸儀則之高堂齊眉人以為福德具備何憾焉子四詢承事郎誠蚤卒叔即玄德君季全義女二嫁某官孫男五人善集賢修撰能文詞孫女若干曾孫男女九人銘曰

抑抑吳伯植節秉仁毀形以逃克昌胤孫傳國中圯是
生番君得其民心徙王策勲代有顯賢文庶日繁廟食
演裔饒惟邇親執經武夷源同派分是生饒公守謙以
文大盈彌虛黜驕鏡昏厥配氏舒廬江之蕃相唐始興
矢辭派騫楚吳犬牙譜諜是遵德儀婉賢象服紛紛訓
子以忠不私其門顯晦偕老死生同根道以易傳德以
簡尊悼哉令宗允顯皇元

海陰陳處士墓誌銘

咸淳元二間吾里陳公肖孫以善政事驟用繇大理寺丞知嘉興輔郡未幾兼浙西提點刑獄踰年兼度支郎官人謂且大用矣會旁郡山寇起罷歸不數月疾卒喪除其子暉伯候平章賈某于馬前平章入政事堂謂宰屬曰陳肖孫一廉可取宜與致仕恩官其子當上奏餘人勿得為例既授將仕郎宋社亡不復可仕矣鄉人尊之為海陰先生先生少歲力古學不屑事科舉聚羣經師說商畧讎證下逮旁聞曲記遺言懿行譜牒星歷之

說皆手抄與梓本書相並篤於信行傾急解難道里寒暑不廢其學深湛詳博尊聞傳信懼悞解者汨其真嘗禁止之非其友不友既友矣必反覆護衛不使有議之者友或叛去先生泊然不為言人益服之楠先處州府君於朋友義尤敦叙而先生行事亦相近故交好尤善厚先府君即世時來城中愛撫彌厚嘗曰汝父宜有後昔百受欺今詎使一無報邪大德五年楠備翰苑屬後屢遷先生喜溢眉睫曰吾所期誠不妄延祐六年二月

得微疾作書與常往來戒用浮屠事且命桷誌其墓幸
以故人子何敢辭先生字貴白甫世居奉化之鷓鴣山
卒時年七十有七葬某鄉某原妣方氏封安人曾祖聰
謀妣孫氏祖師稷以度文明堂恩贈朝散郎妣陸氏鄔
氏追封安人娶樓氏子二人紹廉紹庭孫二人先生仕
不逢時學不展用熙熙然以壽終於後人有徵可無銘
以俟銘曰

駕車康衢佐夔龍日昃之離命不逢寤言弗告隱志充

畲田瘁耕黍稷豐考覈琬琰手澤功大椿養齡蔭龍從
靈璞久閔合鴻濛是式是侶後當隆

處士黃仲正甫墓誌銘

嗚呼自聘舉之法疏人得以易售挹德藝者羞之後法
始密益不肯自進有薦之人不盡識或曰彼士奚足取
又或曰士若是者衆使一取之將曳踵以至楠官翰林
最久故有若吾黃仲正甫之賢明經博聞卒不能啓口
以告于當路嗚呼今亡矣果使無傳則誠有罪矣仲正

事母孝居家無語笑聲待弟姪不使有忤意持敬讓以禮宗姻鄉黨長者洽之幼者慕之其學汪洋暢整經以載道必考其精微幽顯之委折於史辨疆理氏族制度官名之興廢旁搜博徵曲而通確而明故為文辭纒屬不能以窮將臻乎極而始底于用欲以名世者不在仕進也有司三奉科舉令卒不應試而嘗以其說授于其徒昔者聖賢憂道不行於時由列國言之識遇焉斯得矣今天下一轍達而上者其說具在布衣焉以遺逸舉

進以秩祿悉縮在下不能有為仲正之不屑者在是儒
病通乎古而不知今昔之在上位顯重名其行事執愼
誤後世甚者竊高爵講說他方以鉤徵召仲正嘗勃然
不喜然竟不假以年則誠可哀也已仲正諱叔雅父震
宗正少卿提舉浙東常平茶鹽咸淳間號名二千石晚
歲高遜以卒仲正不仕繼志焉耳矣世居慶元慈溪縣
鳴鶴鄉曾祖世堽祖一鶚贈朝奉郎妣趙氏配鄭氏司
農寺主簿大澤之女子二人正倫正倩今葬韋家興之

原延祐七年五月二十二日卒年五十有四銘曰

閼觀稱貞舉世顯榮肥遯靡求孰為之升君允矣恬寡
奇漱英求知者天卒韜智名有年不修莫究其成我銘
孔哀以永厥聲

將作監主簿蔣公墓誌銘

朝奉大夫將作監主簿蔣公諱曉字堯臣淳祐七年進
士以至元二十四年卒年七十有一葬奉化州長壽鄉
邵輿之麓曾祖梗朝奉郎通判台州贈中奉大夫祖如

愚朝請郎通判隆興府贈太中大夫曾祖妣張氏楊氏
伍氏贈令人祖妣諸葛氏封安人贈淑人考嶠文林郎
池州貴溪縣丞贈朝奉大夫妣湯氏贈宜人既葬三十
有六年長子景先卒無子次子昭先次其先德家譜來
請曰蔣實望族七世昭穆皆鉅公著銘罔缺軼我先人
在時予以子孫禮見且承學今予在太史非子銘其誰
宜楠不敢讓銘曰

蔣姓宗姬函亭漢侯居鄞發祥唐季是稠厥孫評事清

淨急施有嗣金紫益振以義忠肅陳公謫明絕朋俾子
允師連桂以登曰高祖考宰邑孤高相京傳私卒忤以
逃是生台州繼以隆興倖貳有聲再世是繩詵詵貴池
丞邑退卑厥兄諫議職穹聞馳愍弟有孤將授門功公
謝弗受迄升南宮試簿仙居復攝寧海却妖節浮民靡
匱貸入理京獄直囚不刑探其隱奸大尹以驚出邑武
進遄易分水嚴盜獫張召公顓治摩礫羸頑請粟食賑
楮帛賦繁直疏罷進神存正祀學飾新象彼庵者叟祠

祝泣想爰倅于越撫民彌加計臣增輸牘諫戢譁佐餉
既終監舶蒞溫香珠翠毳罔游于門輯為成書以儆墨
悞彼相嫉庶改司甌函白璧襲緹卒罹其讒晚佐繕營
國步日窘罄實食貧絕見喜愠少窺刑書復入詞學記
言博精灑墨清聲譜書庚申文紀甲子視階郎中澤奏
冢嗣歲行丁亥九月庚戌飾巾辭終壽七十一厥嬪氏
曹箋詩之曾子曰景先無祿絕承有季昭先守儒俟徵
墓在州南先域接挹集藏于家厥帙為十維公儀觀偉

古動人前聞後訛指掌剖陳魏坐若尸不傾不陂彼諂
有徒正色以止耆舊川淪來者荒塞昭銘墓門以作後
則

清容居士集卷二十九